

DECLARATION  
D V ROY, no. 2

SVR LA REDVCTION

DE LA VILLE DE LA ROCHELLE  
en son obeissance.

Contenant l'Ordre & Police que sa Majesté  
veut y estre establee.



A BESIE RS.

Par JEAN MARTEL, Imprimeur  
& Libraire.

M. DC. XXVIII.

LETTRE DV ROY  
à Monsieur le premier President  
de Tolose.

**M**ONSIEVR LE MASVER,  
Sçachant le contentement que vous  
prenez aux bons succez que Dieu me dône,  
i'ay bien voulu vous enuoyer la Declara-  
tion des Ordres que i'ay fait prendre à ma  
ville de la Rochelle, pour seruir d'exem-  
ple aux Villes qui s'oublieront dauantage,  
& perseuereront à leur rebellion, qu'il ne  
leur restera aucune marque de Ville, priui-  
leges dont ils se rendent indignes par leurs  
damnables resolutions. Mandés-moy l'estat  
du ressort de ma Cour de Parlement; priant  
Dieu, Monsieur le Masuyer, vous tenir en  
parfaite santé. De la Rochelle ce quinzié-  
me Nouembre mil six cens vingt-huict.

LOVIS,  
Et plus bas,  
PHELYPEAVX.



*Declaration du Roy, Sur la reduction de la ville de  
la Rochelle en son obeysſſance.*

**L** OVIS par la grace de Dieu, Roy  
de France & de Nauarre : A tous pre-  
sens & à venir, Salut. Les grandes  
guerres qui depuis tant d'annees ont  
affligé cet Estat, ayant en leur principal fondemēt  
& appuy sur les frequentes rebellions des Ha-  
bitans de nostre ville de la Rochelle ; Nous auons  
estimé que nous ne pouuions donner à nos subjets  
aucun repos assure, ny les deliurer des grandes  
foules & oppressions qu'ils souffrēt depuis si long-  
temps, sinon en retranchant les sources du mal, &  
rangeant ladite ville & ses habitans sous nostre  
obeysſſance: en telle sorte que les troubles qui pro-  
cedoient d'eux n'eussent plus moyen de renaistre.  
A quoy nous estans resolu en l'esperance de la fa-  
ueur Diuine, necessaire à vne si haute, si Royale,  
& si Chrestienne entreprise; Nous en auōs esprou-  
uē le secours si efficace, qu'apres vn long siege de  
quinze mois entiers, les trauaux & fatigues que  
nous y auons souffertes, les hazards de nostre per-  
sonne en plusieurs occasions, les iniures & incom-  
moditez des Hiuers & Estez, apres auoir defait  
ou rendu inutiles trois armées des Anglois appel-  
lez par lesdits Habitans. Nous auons avec le Con-  
seil, singuliere prudence, vigilance, & laborieux



seruices de nostre tres-cher & bien-amé cousin le Cardinal de Richelieu , reduit en fin lesdits Habitans à se ietter à nos pieds, implorer nostre misericorde, & s'offrir à nous , & ladite ville , pour en disposer ainsi que bon nous sembleroit : Ce que nous auons receu avec les resmoignages de l'amour paternel que nous portōs à tous nos Subjets.

Et apres auoir remis ladite Ville en nostre obeïssance actuelle , rendu publiquement graces à nostre bon Dieu , autheur principal de cēt heureux succez , & restably la Religion Catholique, Apostolique & Romaine en ladite ville, Nous auons estimé deuoir , auant toutes choses , en regler l'estat & l'ordre de sa conduite & gouuernement à l'aduenir. A ces causes : Sçauoir faisons, qu'apres auoir mis cēt affaire en deliberation en nostre Conseil ; De l'aduis d'iceluy , & de nostre grace speciale , plaine puissance & autorité Royale, Nous auons dit, statué & ordonné, & par ces presentes signées de nostre main, Disons , statuons & ordonnons.

Que l'exercice libre & public de la Religion Catholique, Apostolique & Romaine sera establie en ladite ville , au pays d'Aunis , & en tout le gouuernement, sans aucun trouble ou empeschement.

Que toutes les Eglises ruinées & demolies , tāt en ladite Ville qu'audit pays & gouuernement, seront restablies & redifiées , & renduës à qui il appartiendra avec les Cimetieres, Maisons & ap-

partenances. Et sur ce qu'il nous a esté remonstré qu'il y auroit plus de cōmodité pour nos subiets de reduire les cinq parroisses de ladite ville à trois: A sçauoir nostre Dame de Cogne, S. Barthelemy, & S. Sauueur, & remettre les Parroissiens de S. Iean du Perot à la Parroisse de S. Barthelemy, & ceux de S. nicolas à la Parroisse de S. Sauueur; Les habitans Catholiques de ladite ville se rangeront esdites trois Parroisses, lors qu'elles seront en estat de les recevoir, avec le consentemēt de l'Euesque Diocesain, & les expéditions necessaire pour l'union dicelles.

Et d'autant que lesdites Cures sont pour la plupart reduites à si grande pauureté, que les Curez n'ayant moyen de viure & de s'entretenir en la decence conuenable, les Parroisses sont destituees de Pasteurs, & nostre peuple abandonné & priué de la nourriture plus necessaire; Nous voulons & ordōns que sur le reuenu appartenant cy-deuant à l'Hostel de ladite Ville, il soit pris telle somme qu'il conuiendra pour suppleer à chacū des Curez de ladite ville, iusques a trois cens liures en tout, & ceux de dehors iusques à deux cens quarente liures chacun, à la charge de resider actuellement & continuellemēt sur le troupeau, a peine de priuation de ladite augmentation de reuenu, pour autant de temps qu'il manqueront à ladite residence: Lesquels deniers reuēans bons pour le defaut de residence, nous affectons à l'Hospital de ladite Ville. Exhortons les Euesques, & Collecteurs, de



mettre esdites Cures des personnes de bonne vie, suffisance, doctrine & capacite requise. N'entendant que ladite augmentation de reuenu soit dōnee qu'à ceux de la probité & capacité desquels nous aurons tesmoignage qu'il appartient; & ce iusques à tant que le procez concernant les dismes de la banlieuë & recision de la trāsfaction passée pour raison de ce soit terminé. Ce qu'estant fait au profit desdits Curez, nous ferōs remettre à nostre Domaine ce que nous leur auons attribué, ou ce qui excedera la somme dont nous entendons qu'ils jōiissent.

Que tous les Ecclesiastiques seront remis en la possession & jōissance libre, & par effect de tous leurs biens, meubles & immeubles: sans toutes-fois pouuoir faire aucune recherche ou demande du passé pour ce qui aura esté pris, ou consommé, fors ce qui ce trouuera en nature; Ce que pareillement nous voulons estre obserué pour ceux de ladite religion pretenduë reformee qui sont demezrez en nostre seruice.

Que les Hospitaux de ladite Ville seront reintegrez en la possession de tous leurs biens, rentes & reuenus, droicts, noms, raisons, & actions a eux appartenans, sans que ceux qui les ont vsurpez ou les tiennent se puissent preualoir d'aucun laps de temps ou possession.

Que l'Hospital de S. Barthelemy, seruant à present aux hommes, & aux femmes, sera separé en deux par vne bonne & forte muraille, excluant

toute cōmunication, laquelle sera cōstruite au lieu  
 qui sera trouué plus commode par les experts, &  
 gens à ce cognoissans. Et qu'en la part qui sera iu-  
 gee plus conuenable pour les hommes, serōt esta-  
 blis les Freres de la Charité, du consentement du-  
 dit Sieur Euesque, pour assister & seruir les per-  
 sonnes qui leur seront portees & conduites selon  
 l'institution de leur Ordre, & la part du reuēnu  
 qui sera iugee deuoir estre affectee audit Hospital  
 des hommes, sera maniee, & administree par deux  
 bons, & principaux Habitans de ladite ville, & vn  
 Receueur, lesquels nous commettrōs par chacun  
 an; duquel reuēnu ledit Receueur rendra compte  
 selon les Reglements pour ce portez par nos Or-  
 dōnances: Et en l'autre part dudit Hospital destiné  
 pour les fēmes, serōt avec ledit consentemēt mi-  
 ses & establies les Religieuses Hospitalieres, tirees  
 de celles qui sont establies en nostre ville de Paris  
 pour auoir soin des femmes & filles malades, &  
 iouyr de la portion dudit reuēnu qui leur sera af-  
 fectee selon les Constitutions & Reglemens qui  
 leur ont esté donnez par leur establissement en  
 nostredite ville de Paris: Enjoignons aux vns &  
 aux autres de receuoir ausdits Hospitaux tous les  
 malades attaints des maladies que l'on a accoustu-  
 mé de traiter aux Hospitaux ordinaires de nostre  
 Royaume, sans distinction de religion, & les trai-  
 ter tous avec tant de soin, de douceur & de cha-  
 rité qu'ils en reçoient contentement & consolati-  
 on. Et affin que ledit Hospital puisse plus com-



modément porter la despence necessaire, Nous auons à iceluy vny & vnissions l'Hospital de saint Ladre, & tous les biens & droits à luy appartenâs, à la charge neantmoins de satisfaire aux charges qui estoient sur iceluy. pour les Lepreux du pays de son estenduë.

Qu'il sera erigé vne Croix en la place ditte du Chasteau, au pied d'estal de laquelle sera inscript en sommaire la Reduction de ladite ville. Et que tous les ans au premier iour de Novembre il sera fait en ladite ville vne Procession Generale & solemnelle en memoire de la Reduction d'icelle en nostre obeïssance, & pour en rendre grâces à Dieu par l'ordre dudit sieur Euesque.

Et voulans en la memoire de plusieurs nos bons seruiteurs decedez pour nostre seruice, conseruer le Cimetiere beny au terroir de Coreille, auquel ils ont esté inhumez, & la Chapelle en laquelle les Religieux Minimes de S. François de Paule ont celebré continuellement le seruice Diuin, administré & mis en terre lesdits gens de guerre (auquel exercice mesmes plusieurs d'entr'eux ont aussi fini leurs iours.) Nous voulons & ordonnons que ledit Cimetiere soit conserué cy-apres en ladite nature, sans qu'il puisse estre à iamais profané, & qu'en ce lieu soit construit vn Cōuent de Religieux dudit Ordre des Minimes; & pour cet effect achiepté huit arpens de terre au mesme endroit, & qu'à la porte principale de l'Eglise dudit Cōuent soit graué sur deux tables de cuiure aux deux costez de



de ladite porte, vn sommaire récit de l'ouurage de la Digue, construite au trauers du port de ladite ville, & de nostre armee Naualle, ausquelles en nous seruant la pluspart de nos seruiteurs inhümez audit Cimetiere ont finy leurs iours.

Remettons, pardonnons & abolissons ausdits Habitans le crime de leur rebellion commise depuis ce dernier mouuement, & leur donnons & promettons toute seureté pour leur vie. Deffendant toute recherche qui pourroit estre faite contre eux pour raison de ladite rebellion. Voulons qu'ils ayent l'exercice libre de la Religion pretendue reformee dans ladite ville, au lieu qui il sera par nous ordonne pour eux; ayant retenu & reserué le bastiment cy-deuant seruat audit vsage en la place du Chasteau, pour estre ledit bastiment appliqué à vne Eglise Cathedrale, & seruir à vn Euesque, Chanoines, & autres personnes necessaires à vne Eglise de cette nature, que nous serons prier nostre S. Pere le Pape de vouloir eriger en ladite ville, ou y transferer le Siege de celle des environs qui se trouuera plus commode.

Que lesdits Habitans estans en ladite ville, lors de ladite reduction, seront restablis en leurs biens meubles & immeubles, de quelque nature qu'ils puissent estre, nonobstant toutes condamnations, dons, & confiscations qui en pourroient auoir esté faites à cause dudit crime de rebellion, fors & excepté la iouissance du reuenu de leurs terres, les meubles, bois coupez, & debtes qui ont esté receuës iusques à present, actuellement & sans fraude.

Que les gens de guerre nos Subjcts non Bourgeois ny Habitans de ladite ville, qui se sont trouuez en icelle lors de ladite reduction, iouyront des graces cy-deus exprimees, suiuant l'estat que nous auons fait faire de leurs noms & surnoms, à la charge de ne point porter les armes contre nostre seruice, à peine de priuation de nostre presente grace.

Deschargeons lesdits de la Rochelle, tant Habitans que gens de guerre, estans en icelle lors de ladite reduction, &

tous actes d'ostilité généralement quelconques, negociation es pays estrangers, & de tous autres sans qu'ils en puissent estre recherchez, fors pour les cas execrables exceptez par les Edicts, & ceux qui peuvent concerner nostre personne. Deschargeons pareillement le dits de la Rochelle des fontes de Canon, fabrication de monnoye, faisie & prise de deniers, tant Ecclesiastiques que Royaux, & autres en ladite Ville, ensemble des leuées, & contributions ordonnées pour l'entretenement des gens de guerre & contraintes decernées contre les absens, mesmes par demolitions de leurs maisons & tous autres employez aux choses susdites en ladite Ville. Demeureront aussi lesdits habitans & gens de guerre deschargez de tous iugemens, sentences, & Arrests qui pourroient auoir esté donnez contre eux à l'occasion de leur rebellion pendant ces mouuemens, les Iuges, Conseillers ou Cômmissaires qui auront assisté aux Côseils tenus extraordinairement en ladite Ville, ne pourront estre recherchez de tous les iugemens Ciuils & Criminels donnez en iceux, ny mesmes les particuliers, au profit desquels lesdits Iugemens, qui auront esté donnez pour ce qui cōcerne les prises & butins; Et sur tout ce, imposons silence perpetuel à nostre Procureur General, & ses Substituts. Les iugemens, amandés, condamnations, suspensions, & interdictions donnees par les Iuges Presidiaux de ladite Ville, tant contre celuy qui portoit lors qualité de Maire en ladite Ville, que ceux qui l'ont assisté demeureront comme nuls & non aduenus: comme semblablement les procedures faites en suite contre aucuns desdits Iuges demeureront nulles, sans qu'aucun de ceux qui y ont esté employez de part & d'autre en puissent estre recherchez, non plus que ceux qui ont esté deschargez de la mort du nommé Touruet par le iugement donné pour raison de ladite mort, lequel iugement nous voulons demeurer & auoir lieu.

Auons esteint & aboly, esteignons & abolissons à perpetuité la Mairie, Escheuinage, Corps & Communauté de



Ville, Ordre des Pairs, & celuy des Bourgeois, sans qu'à l'advenir il puisse auoir aucun vsage en ladite ville, ny qu'il en puisse estre fait aucun reſtabliſſement, à peine contre ceux qui le pourſuiuent & en feront inſtance, d'eſtre punis cômme criminels de leze Maieſté, & ordonnons que la cloche qui ſeruoit cy-deuant à conuoquer leſdites aſſembles de ville ſoit oſtee & fonduë.

Abrogeons, reuoquons & annullons tous les droicts & Priuileges, franchises & exemptions attribuez cy-deuant à ladite Ville, Corps, Communauté, & Officiers d'icelle; Maires, Eſcheuins, Pairs & autres, ſans preiudice toutes-fois des droicts acquis par ceux qui ont cy-deuant exercé leſdites charges, iuſques au iour que ladite Ville ſ'eſt declarée rebelle contre noſtre ſeruite en ces derniers mouuemens de la deſcente des Anglois en l'Iſle de Ré; Auons reuyn & reuuiſſons à noſtre Domaine l'Hoſtel commun de ladite Ville & tous les autres baſtimens, Magaſins & lieux à luy appartenans enſemble tous les biens, droits, meubles & immeubles, rentes, redeuances, reuenus, & tous autres biens quelconques, tant en ladite Ville que hors icelle: enſemble toute la Juſtice & Police appartenans & attribuez à l'Hoſtel & Communauté de ladite Ville, pour demeurer à perpetuité inſeparablement vnis à noſtre dit Domaine, eſtre regis & gouuernez, adminiſtrez, receus & employez par nos Officiers chacū en ſon eſgard nonobſtāt tous dōs qui pourroient en auoir eſté obrenus de nous, leſquels nous auōs reuoqués & reuoquōs par ces preſentes. Et pour le regard des droicts que ledit Hoſtel de Ville prenoit ſur la Marine & Offices qu'il exerçoit, pour raiſon de ce, nous les auons reuuiſſis à la charge du grand Maiſtre, Chef & Surintendant general de la Nauigation & Commerce de France, pour eſtre leuez & exercez par les Officiers de la Marine, ainſi qu'ils estoient par ceux qui estoient commis par ladite Ville.

Voulons & ordonnons, que les murs, rempars, baſtions,

& autres fortifications de ladite Ville fors les tours de S. Nicolas, de la Chaine, & de la Lanterne, & les murs vers la mer, depuis S. Nicolas iusqu'à ladite tour de la Lanterne, soient rasees rés pied, rés de terre, & les fondemens arrachez, les fossez comblés en sorte que de tous costés l'accez & l'entrée de ladite Ville soit libre & facile, que la charrue y puisse passer comme sur les terres de labour, & que iamaies elles ne puissent estre restablies, non pas mesmes par simples murailles, cōme de closture ou iardin, ou continuation des murailles, des maisons & heritages adjacens ny autrement: Declaron criminel de leze Majesté tous ceux qui attenteront quelque chose au preiudice du present Article, ou qui oseront nous presser & importuner pour obtenir quelque chose au contraire du contenu en iceluy.

Auons revny & revnissions au Siege du Seneschal toute la Justice, & Police appartenant cy-deuant audit Hostel de Ville, pour estre ladite Police exercee par deux Officiers dudit Siege, avec quatre Bourgeois, lesquels nous nommerons par chacun an, & quatre Commissaires qui seront par nous creez au lieu de quatre Procureurs de Police qui estoient cy-deuant esleus en ladite Ville, nous reseruant au surplus de faire tels reglemens pour la Police de ladite Ville, que selon l'estat d'icelle, & les avis de nos Officiers & autres nous verrons estre à faire.

Auons pareillement supprimé & supprimons le Siege de la Preuosté de ladite Ville à present vaccant, ensemble celui du Seel, & les auons revnis & revnissions au Siege du Seneschal & Officiers d'iceluy, pour estre exercés par les Iuges dudit Siege, & incorporés en ladicte Jurisdiction: à la charge neantmoins de recompenser raisonnablement ceux qui peuuent y auoir interest, selon qu'il sera arbitré en nostre Conseil.

En consequence desquelles vnions & augmentation de Jurisdiction attribuee par celsdites presentes audit Siege de Seneschal, & gens tenans le Siege Presidial en ladite Ville



de la Rochelle, Nous auons creé & erigé. creons & erigeons par ces presentes, six Offices de Conseillers audit Siege, avec les mesmes droicts & gages que les autres. Vn substitut de nostre Procureur, aux mesmes droicts & fonctions qu'il est porté par la creation de semblables Offices, & pour exercer ladite charge selon le reglement que nous ferons faire en nostre Conseil entre nostre Procureur & luy: Quatre Commissaire de Police cy-dessus mentionnez, aux mesmes fonctions que lesdits Procureurs de Police, & que les Commissaires du Chastelet de Paris ont au faict de ladite Police, Seize Procureurs, Trois Notaires, Et douze Sergens, pour estre ausdits Offices pourueu de gens suffisans & capables.

Et d'autant que la Iustice de ladite Preuosté & du Séel, & celle de la Police & du Iuge de la Mairie, consiste principalement en l'expédition des causes des Habitans de ladite Ville & Banliene, qui requierét expedition plus prompte, afin que ceux qui y recourent soient moins distraits de leur trafic & negoce; Nous voulons & ordonnons qu'il soit pris & arresté vn ou plusieurs iours en chacune semaine, selon qu'il sera iugé necessaire pour vacquer à l'expédition desdites causes par les Iuges dudit Siege qui se trouveront presens, auxquels nous enjoignons de les terminer le plus sommairement qu'il se pourra, sans les appointer par escrit s'il n'est bien necessaire, & lors qu'il sera besoin de iuger les causes au Conseil, & par escrit. Nous defendons ausdits Iuges Presideaux de prendre plus grands droicts & espices que ceux qui se prenoient euidits Sieges (ausquels sans ladite suppression & vniou lesdites causes deuoient estre iugées) à peine de concussion, suspension de leurs charges, & de repetition contre eux, leurs vesues & heritiers, sans que par le laps de temps il en puissent estre deschargez.

Et quant à la Iurisdiction des Iuges Consuls, nous l'a-

uons conseruée & conseruons en la fonction & exercice selon les Edicts sur ce faits: A la charge toutesfois que pour les trois années prochaines ladite Iurisdiction sera exercée par ceux du corps des marchans & autres Officiers que nous nommerons à cette fin.

Ordonnons que les Aydes, Traitte Foraine & Domaniale, & autres droicts accoustumez estre leuez en nostre Royaume auront lieu, & seront leuez dans ladite Ville aux Bureaux qui pour ce y seront establis, sans toutesfois qu'il puisse estre fait recherche de ce qui n'a pas esté payé par le passé pour raison des droicts & Fermes qui se leuoient en ladite Ville, ny qu'il puisse estre imposé ny leué en icelle plus grands droicts, ny autres que ceux qui se leuent aux autres Villes de nostre Royaume.

Et en tant que touche les tailles, ayans reuoké toutes les exemptions, Nous declérons ladite ville y estre tenue & subiecte, & neantmoins en faueur & consideration du Commerce. Nous l'auons abonnée & abonnons à la somme de quatre mill iures par chacun an seulement, au lieu de pareille somme à laquelle elle estoit cy deuant imposée pour la subuention.

Defendons qu'en ladite Ville aucun estranger y puisse venir demeurer de nouveau pour y domicile & famille, sans nostre expresse permission par lettres de nostre grand Sceau, encores qu'il eut obtenu Lettre de naturalité, & nonobstant les clauses generales portées par lesdites Lettres, qui permettent à ceux qui les obtiennent de s'abiter en telle des villes de nostre Royaume qu'ils voudrôt.

Que nulle personne faisant profession de la Religion pretendue reformée, & d'autre que de la Religion Catholique, Apostolique & Romaine) ne sera receu à venir de nouveau habiter en ladite Ville, si ce n'est qu'il y ait demeuré cy-deuant, & y fut auparauant ladite ladite descente des Anglois.



Deffendons pareillement à tous les Habirans de ladite Ville qu'ils n'ayent & ne tiennent en leurs maisons, soit pour leur vsage & commodité particuliere, soit pour trafic ou commerce, aucunes armes de quelque sorte que ce soit, poudre, meche, ny balles, ny en exercer aucun trafic, par soy ou par autrui, sans nostre particuliere & expresse permission par lettres signées d'un des Secretaires de nos Commandemens, & Sclées de nostre grand Sceau, à peine d'estre punis comme criminels de leze Majesté, les contrauentions à nos Ordonnances en ce subject ne pouvant estre sans un iuste soubçon des premiers crimes.

Ordonnons qu'il sera estably vn Intendant de la Iustice en ladite Ville, pays & gouuernement, & aux pays de Poitou & Xaintonge, depuis la riuere de Loyre iusques à celle de Garonne & Gironde, & aux Isles, pour auoir l'œil à l'observation des choses cy-dessus, de nos Ordonnances, exercice de la Iustice en toutes fonctions, soulagement de nostre Peuple, & à tout ce qui concerne nostre seruice & l'exécution de nos Ordonnances, susuât les Commissions que nous leur ferons expedier, à laquelle charge nous auons dés à present commis le sieur de la Thuillerie Conseiller en nostre Conseil d'Etat, & Maistre des Requestes ordinaire de nostre Hostel, & y sera d'oresnauant commis de trois ans en trois ans de personages de qualité, experience & suffisance conuenable, soit de nostre Conseil, ou des Maistres des Requestes de nostre Hostel, & autres officiers de nos Cours Souueraines. **SI DONNONS EN MANDEMENT** à nos Amez & feaux les gens tenans nostre Cour de Parlement de Paris, Que ces presentes nos Lettres de Declaration ils ayent à faire lire, publier & registrer, & le contenu en icelles, garder & obseruer sans y contreuenir, ny souffrir y estre contreuenue en aucune maniere. **MANDONS** aussi aux Gouverneurs & nos Lieutenans Generaux de nos Prouinces, chacun en l'estendue de leurs charges de tenir la main à l'exécution de celsdites

presentes. CAR TEL EST NOSTRE PLAISIR. Et afin  
que ce soit chose ferme & Itable à tousiours, nous auons  
fait mettre nostre Seel à cefdites presentes, sauf en autres  
choses nostredit droit, & l'autuy en toutes. Donné à la  
Rochelle au mois de Nouembre l'an de grace mil six cens  
vingt-huict, Et de nostre Regne le dix-neufieme.

Signé. LOUIS.

Et plus bas par le Roy. PH ELIPE A X X.

Et seellées en cire verte, sur lacs de loye rouge & verte.













